

DESCRIPTION DE LA CONTREE QUI EST

ENTRE PORTLANDE, ET L'ISLE DE

Wicht : & de la jusques à Douures.

LA contrée contenue entre Portlande, & l'Isle de Wicht, & de la à Douures, est tresgrande; & contient autant de terroir, que les deux regions, des deux tables precedentes. En premier lieu elle cōtient la terre de Dorcestre, & l'excellente Isle de Wicht, Contient aussi les terres de Suidhampton, Suidsex, Suidrey & le Pays de Cant. Lesquelles terres sont ornées de beaucoup de villes non closes, & abondantes en grain, & divers fructs de terre, voire de tout ce qui est necessaire pour l'entretienement de la vie humaine. De maniere, que la matiere seroit assez ample, à parler de chascque contrée à part, si le lieu, & l'occasion le concedast,

Dorcestre est limitrophe en longueur, à la terre de Sommer seth jusques à Wilschire & sont seioinctes par un fleuve qui à ses sources es montaignes voisines de Mamsbery lequel decoulant le log de Bathon, passe par Arxbridge, & se desgorge au golfe de Bristo. Or ce goulfe separe les limites Occidentales d'Angleterre, du Pais de Suidgalles. La contrée de Suidhampton, est terre Boscageuse, & rend toutes sortes de bois, principalement sommiers & poutres de Chesne, lesquels on use en Angleterre, tant aux bastimens de maisons, que de navires. Plus est ceste contrée fertile de grain, & riche de gros & menu bestail, & de tout ce qui peut servir à la nourriture du corps humain. Aussi est elle bien peuplée, & riche de gens nobles, & grands personages.

Suidrey est un terroir par tout abondant en prairies, & pasturages, les plus excellentes de toutes les contrées de l'Angleterre: car ce seul quartier nourrit de Bure presque la Ville de Londres, A cestuy terroir est confin le Pais de Suidsex, qui est montaigneux, & riche de Boscages & Forests. Les montaignes sont fertiles, produisant de fort bonne herbe: parquoy la terre est riche de menu bestail, & si font des melleurs draps d'Angleterre. La noblesse y à plusieurs exercices biens plaisans & agreables: & à cause de la situation du Pais bien propre, le plaisir & deduit de la chasse des bestes sauvages, & la Fauconnerie y sont ordinaires, Ceste contrée à plusieurs parcs pour nourrir bestes sauvages, a sc avoir, Crfs, Biches, Cheuruls, Dains, & plusieurs autres.

Le Pais de Cant, est vne des contrees principales & meilleures d'Angleterre: elle nourrit brebis sans nombre, & s'y font des fins draps & autres en si grand nombre, qui on les enuoye en toutes les contrées de l'Europe. Ce terroir est riche de grand bois, & d'un peuple fort belliqueux: il a beaucoup de villes non murées, de lesquelles Douures est la dernière, ou il y a un fort Chasteau, En ceste region sont les villes de Cantelberge & Rochestre, munies de fossez & murailles, & sont Eueschez. En ce terroir demeure grãde noblesse, & bien riche. Ces trois contrees Cant, Suidsex, & Suidrey, sont situées le long du fleuve Tamise, riniere de Londres, de laquelle sera fait mention plus ample en la description qui s'ensuit.